

Умматимнинг барчаси жаннатга кирар...

10:00 / 19.08.2017 3543

Абу Ҳурайра розияллоҳу анҳудан ривоят қилинади:

«Набий соллаллоҳу алайҳи васаллам:

«Умматимнинг барчаси жаннатга кирар, бош тортганларгина кирмас», дедилар.

«Эй Аллоҳнинг Расули, ким бош тортади?» дейишди.

«Ким менга итоат қилса, жаннатга киради, ким менга осий бўлса, бош тортган бўлади», дедилар».

Бухорий ривоят қилган.

Шарҳ: Пайғамбар алайҳиссалом мусулмон одамнинг жаннатга кириши унинг у зотга итоат қилишига боғлиқ эканини таъкидламоқдалар.

«Умматимнинг барчаси жаннатга кирар, лекин бош тортганларигина кирмас».

Яъни «Умматимнинг киришдан бош тортганлардан бошқаси жаннатга киради», демоқдалар. Бундан ажабланган саҳобалар: **«Эй Аллоҳнинг Расули, ким бош тортади?** Жаннатга киришдан бош тортган одам ҳам бўладими?» дейишди. Бу саволга жавобан у зот:

«Ким менга итоат қилса, жаннатга киради, ким менга осий бўлса, бош тортган бўлади», дедилар.

Яъни Пайғамбар соллаллоҳу алайҳи васалламга итоатдан бош тортиш жаннатга киришдан бош тортишга баробардир. Пайғамбар соллаллоҳу алайҳи васалламга итоат қилиш у зотнинг Суннатларини маҳкам тутиш билан бўлади. Пайғамбаримиз соллаллоҳу алайҳи васалламнинг Суннатларига амал қилмаган одам эса у зотга осий бўлади. Демак, хулоса аниқ:

Муҳаммад соллаллоҳу алайҳи васалламнинг Суннатларига итоат қилган киши жаннатни топади!

Муҳаммад соллаллоҳу алайҳи васалламнинг Суннатларига осийлик қилган
киши дўзахни топади!